

ՍՏ. Մ. Հակոբյան

ԱՐԵՎՄՏԱՀԱՅԵՐԻ ԻՆՔՆԱՊԱՀՏՊԱՆՈՒԹՅՈՒՆԸ 1915—1916 թթ.

Օսմանյան կայսրությունում հայերի զանգվածային ջարդերի ժամանակ տարերայնորեն արևմտահայերի ինքնապաշտպանության օջախներ առաջացան Վանում, Շատախում, Վանա լճի լիճ կղզում, Բաղեշում, Շապին-Գարահիսարում, Մուշում, Սասունում, Մարաշում, Զեյթունում, Խնուսում, Խարբերդում, Բաբերդում, Մուսա-Լեռան գագաթում, Ուրֆայում, Պարտիզակում և այլ վայրերում:

Իր ծավալով ամենախոշորը և հաջողը Վանի հայերի ինքնապաշտպանությունն էր: Նրանք ամենից առաջ գուշակեցին թուրքական իշխանությունների մտադրությունները և լավ պատրաստվեցին դիմադրության: Մոտ 1000 ամելիներ, սպասվող դատաստանից փրկվելու նպատակով՝ դասալքեցին թուրքական բանակի շարքերը և թաքնվեցին Վանի հայերի մոտ: Վանի նահանգապետ (վալի) Զեվդեթ բեյը հայերից պահանջեց նրանց իշխանությանը հանձնել: Բայց Վանի հայերը, իմանալով ամելիներից սպասվող խոշտանգումների մասին, չկատարեցին այդ պահանջը: Միևնույն ժամանակ համոզված լինելով, որ Զեվդեթը իրենց չի ների և անսպալման ձեռք կառնի պատժիչ միջոցներ, վանեցիները սկսեցին ամրացնել քաղաքի Այգեստան և Միջնաբերդ հայկական թաղամասերը:

1915 թ. ապրիլի 7-ին Զեվդեթը գերազանց ուժերով գրոհեց այդ թաղամասերի վրա, բայց հայերը ետ մղեցին գրոհը: Այդ օրվանից սկսվեցին Վանի հայկական թաղամասերի պաշտպանների հերոսական սխրագործությունները: Պատրաստվեցին պաշտպանողական կառուցումներ: Վանի պաշտպանության բոլոր 80 հանգույցները իրար հետ միացվեցին ստորերկրյա ուղիներով և խրամատներով:

Ինքնապաշտպանության համար անհրաժեշտ ռազմամթերքը հայերը պատրաստում էին իրենց ուժերով: Նրանք օրեկան պատրաստում էին մինչև 200 փամփուշտ և բազմաթիվ ձեռքի նռնակներ: Հայ վարպետների ստեղծած պղնձյա հրասանդների հեռահարությունը հասնում էր մինչև 2000 մ, բացի դրանից, նրանց տրամադրության տակ էր թուրքերից դրաված երկու թնդանոթ: Պաշտպաններին օգնում էին նաև նրանց ընտանիքների անդամները՝ կանայք և երեխաները: Մարտիկների թիվը հասնում էր մոտ 40.000 մարդու: Բայց սննդամթերքի անբավարարության հետևանքով, վրա հասավ սովի մատնվելու վտանգը, սպառվեց ռազմամթերքը:

Վանի պաշտպանները ստիպված եղան դիմել ռուս հրամանատարության օգնությանը: Նրանք Կովկասի ռազմաճակատի շտաբ ուղարկեցին իրենց սուրհանդակին մի գրությունով, որտեղ ասվում էր. «Գավառում սպանված է մինչև 6.000 մարդ: Վանը և Շատախը համառ դիմադրում են... Հարում ենք մեր վերջին ուժերը: Ամեն օր սպասում ենք ռուսական օգնության: Աղաչում ենք շտա-

պել: Հետո ուշ կլինի»¹: Այդ վիճակի մասին հաղորդվեց ռուսական բանակի պլխավոր շտաբին, իսկ այնտեղից Փարիզ և Լոնդոն²:

Այսպիսով, դեռ 1915 թ. ապրիլին աշխարհն իմացավ Վանի հայերի հեղհուսական ինքնապաշտպանության մասին:

1915 թ. մայիսի 3-ին, 27-օրյա կռիվներից հետո, քաղաքի պաշտպանները տեղեկացան, որ իրենց վրա հարձակվող թուրքական զորքերը, ռուսական բանակի մոտենալու կապակցությամբ, դադարեցրին պաշարումը և հեռացան: Այդ ժամանակ այգեստանցիները դուրս եկան իրենց թաքստոցներից և ոչընչացնելով մնացած թուրքական ժամապահներին՝ զրավեցին Թոփրակ-Կալե և Հաջի-Փեքիրի թուրքական թաղամասերը, իսկ Միջնաբերդի պաշտպանները՝ վարչական շենքերը, ռազմական պորանոցները, բերդը, դպրոցները, մզկիթը և բանտը: Մայիսի 4-ին Այգեստանի և Միջնաբերդի պաշտպանները, որոնք մինչ այդ գործում էին առանձին-առանձին՝ միացան: Մայիսի 7-ին քաղաք մտան նաև ռուսական զորքերը և հայկական կամավորական ջոկատները³:

Ինքնապաշտպանության առաջին շաբաթից հետո դեպի Վան սկսեցին տեղափոխվել շրջակա գյուղերի բնակիչները՝ պաշտպանողական համառ մարտեր մղելով թուրքական զորքերի դեմ: Առանձնապես ծանր էին Շատախի Դարման, Շուշանց և Վարագ հայկական գյուղերի բնակիչների մղած մարտերը: Շուշանցիները և վարագցիները երկու շաբաթ թշնամուն համառ դիմադրեցին, ճեղքեցին թշնամու օղակը և անցան դեպի Վան, միացան Այգեստանի պաշտպաններին: Իսկ Դարման գյուղի բնակիչներին, որոնք չկարողացան անցնել Վան, Այգեստանից օգնություն ուղարկվեց: Թշնամուն դիմադրություն ցույց տվեցին Արձակ, Փեսանդաշտ, Բերդ և Վանի վիլայեթի մի շարք ուրիշ հայկական գյուղերի բնակիչները⁴: Կազմակերպված էր Սպարկերտ գյուղի բնակիչների ինքնապաշտպանությունը: Մի ամբողջ ամիս (մայիս) նրանք մանևրային հաջող մարտեր էին մղում թուրքական զորամասերի դեմ⁵:

Ինքնապաշտպանությունը լավ էր կազմակերպված նաև Վանա լճի Լիմ կղզում: Այստեղ թուրքական դահիճներից թաքնվեցին մոտ 8000 հայեր: Դիմանալով թուրքերի երկամսյա պաշարմանը, Լիմի հերոսները արիաբար դիմադրեցին մինչև ռուսական զորքերի մոտենալը⁶:

Բիթլիսի վիլայեթում թշնամուն հակահարված տվեցին Շամիրամ գյուղի բնակիչները: Նրանք բարձրանալով նեմրութ լեռը, այն վերածեցին պաշտպանական ամրոցի: Շամիրամցիները նեմրութ լեռան վրա քսան օր մնալուց հետո, ճեղքեցին թուրքական զորքերի օղակը և շրջակա հայկական գյուղերի բնակիչների հետ միասին դուրս եկան պաշարումից⁷:

¹ ЦГВИА, ф. 2000с, оп. 1, д. 810, л. 297.

² Տե՛ս նույն տեղում:

³ Վանի հայերի ինքնապաշտպանության մասին տե՛ս շտաբի Կողմ, ֆ. 242, ց. 1, գ. 29, թթ. 1—77, «Կոչնակ», 1915, էջ 55—60, 83—85, 109—111, 167—170, 241—244, 615, 785—787, 933—934, «Վան-Տոսպ», 1915, № 22—23, «Армянский вестник», Москва, 1916, № 18, «Армяне и война», Одесса, 1916, № 6, стр. 79—80: «Դեսպան Մորկենթաուի պաամածները», Պոլիս, էջ 292—293, «Оборона Вана», Москва, 1917: «Le traitement des armeniens dans l'Empire Ottoman (1915—1916)», Paris, 1916, p. 175—197.

⁴ Ե. Խ. Ռ շ տ ու ռ ի, Վանի ղեպերը և ինքնապաշտպանությունը, «Կոչնակ», 1915: Արտակ Դարբինյան, Հայ ազատագրական շարժման օրերեն, էջ 292—294, 300, 305:

⁵ «Մշակ», 17 հուլիսի, 1915, № 154, էջ 1.

⁶ շտաբի Կողմ, ֆ. 45, գ. 22, թ. 182.

⁷ Տե՛ս «Կոչնակ», 27 նոյեմբերի, 1915, № 48, էջ 1074.

Մուշի հովտում ինքնապաշտպանություն կազմակերպեցին Ալիջան, Ուրունկ, Հոմա, Առաքելոց վանքի և այլ գյուղերի բնակիչները: Հայերի ջարդը այս շրջանում դեկավարող ավազակ Գիլմի բեյը ասկյարների երեք գումարտակով և Մուսա բեկի ու Նազրեթ շեյխի բուրդ հորդաներով 1915 թ. հունիսի 29-ին ձերբակալեց մոտ 500—600 մշեցիներ, նրանց քաղաքից դուրս տարավ և գնդակահարեց: Միայն դրանից հետո զահիճներին հաջողվեց ներխուժել Մուշ, սլաշարել քաղաքը և 24 ժամ շարունակ գնդակոծել այն: Քաղաքի պաշտպանները մեծ թվով զոհեր տվեցին, բայց անձնատուր չեղան: 10—12 հազար մշեցիների հաջողվեց թաքնվել Ձոր դժվարամատչելի թաղամասում, որտեղից նրանք 1915 թ. հուլիսի 5-ին գիշերը խիզախ մարտերով, կորցնելով իրենց կազմի համարյա կեսը դուրս եկան շրջապատումից: Լեռներում, միանալով Մուշի շրջակա գյուղերի թաքնված գյուղացիների հետ, կրկնապատկելով իրենց ուժերը, նրանք վերսկսեցին պայքարը: Սու մղելով թուրքական զրոհները, նրանք կենտրոնացան Կան լեռան վրա և համատեղ ուժերով ինքնապաշտպանություն կազմակերպեցին: Բայց դա երկար չտևեց: Փամփուլտների պակասը, սովի սպառնալիքը մշեցիներին ստիպեցին թողնել Կան լեռը: Նրանք փոքր խմբերով փորձեցին թափանցել թուրքական կորդոնները և հեռանալ: Սակայն այդ հերոս մարտիկներից միայն երեսուն մարդու հաջողվեց փրկվել, մնացածները զոհվեցին⁸:

Իրենց ֆիզիկական գոյությունը պաշտպանելու համար պայքարի էին ելել նաև սասունցիները: Թուրքական զորամասերը 1915 թ. հուլիսի կեսերին շրջապատեցին Սասունը և այն կտրեցին արտաքին աշխարհից: Պակասում էր հացը, աղը, զենքը: Չնայած դրան, սասունցիները վճռեցին զիմադրել հարձակվող թշնամուն: Նրանք առաջին օրերին հեշտությամբ ետ էին մղում թշնամու զրոհները: Սպառնալիք ունենալով զոհվելու պաշարը լրացնելու նպատակով երեք օր հետո, սասունցիները ստիպված եղան դուրս գալ իրենց թաքստոցներից և խիզախ հարձակումների դիմել: Նրանց դրությունն այնքան ծանր էր, որ ստիպված էին փամփուլտները լցված վառոդը բաժանել երկու մասի, որպեսզի կարողանան գործի դնել նաև կայծքարե հրացանները:

Թուրքական հրետանին աստիճանաբար քայքայում էր սասունցիների ամրությունները, նոսրանում էին նրանց շարքերը: Երբ արդեն սպառվում էին վերջին փամփուլտները, սասունցիները որոշեցին ինչ գնով էլ լինի ճեղքել թուրքական շրջապատումը, գնալ հյուսիս՝ դեպի ուսսական զորքերը: Դրա համար նրանք բաժանվեցին փոքր խմբերի և դիմեցին հակազրոհների: Անհավասար մարտերում նրանց մի մասը ոչնչացվեց, իսկ մյուս մասին հաջողվեց թափանցել անտառները: Նրանց հետապնդող թուրքերը դիմեցին նենգ միջոցների: Վերջիններս լուրեր տարածեցին այն մասին, թե իբրև կառավարությունը հայերին ներում է շնորհել: Սովի մատնված հազարավոր սասունցիների ոչինչ չէր մնում անել, քան հավատալ այդ լուրերին, հանձնվել թշնամուն: Այդպես նրանք թուրքերի ձեռքն ընկնելով՝ տեղն ու տեղը ոչնչացվեցին: Սակայն հազարավոր հայեր չենթարկվեցին թուրքական պրովոկացիային, բարձ-

⁸ Մուշի հայերի ինքնապաշտպանության մասին տե՛ս «Մշակ», 1915, № 207, էջ 1, «Կոշնակ», 1915, № 35, էջ 743, № 49, էջ 1100. «Армянский вестник», 1916, № 10, стр. 21. «Армяне и война», 1916, № 4, стр. 47. «Кавказское слово», 1915, № 231, стр. 2. Վ. Փափաջյան, *Իմ հուշերը*. Կ. Բ., Պետրոպոլ, 1932, էջ 387—380. «The treatment of Armenians in the Ottoman Empire», London, 1916, p. 82.

րացան լեռները և ավելի խորացան անտառներում: Երբ ռուսական զորքերը 1916 թ. գրավեցին Սասունի շրջանը, անառիկ լեռներից ցած իջան անընկճելի մարտիկների, կանանց և երեխաների խմբեր⁹: Մի վկայությամբ, այդ միջոցով փրկվեց մոտ հինգ հազար հայ¹⁰:

Արևմտահայերի ինքնապաշտպանության մանր օջախներ առաջացան նաև էրզրումի վիլայեթի հնուսի կազայում: Այստեղ Ղարա-Չոբան գյուղի մի խումբ հայեր մարտերով ճեղքեցին թուրք-քրդական օղակումները և դուրս եկան ռուսական զորքերի դասավորության շրջանը:

Այդ նույն կազայի մի ուրիշ գյուղում հայ պատանիների մի խումբ քաջաբար ետ էր մղում թուրք դահիճների գրոհները: Երբ վերջացավ փամփուշտի պաշարը, այդ խումբը ցրվեց տարբեր ուղղություններով¹¹:

Բաբերդ քաղաքի շրջանում հայ պատանիների մի ուրիշ խմբի հաջողվեց ճեղքել թշնամու օղակը, անցնել լեռները, ապա համարձակ հարձակումներ կատարել թշնամու վրա: Քաջերը կարողացան դիմանալ մինչև ռուսական զորքերի գալը¹²:

Սվաղի վիլայեթում թշնամուն համառ դիմադրություն ցույց տվեցին Շապին-Գարահիսար քաղաքի բնակիչները: Նրանց ինքնապաշտպանությունը տևեց 1915 թ. հունիսի 2—28-ը: Սկզբում շապին-գարահիսարցիները, ամրությունների վերածելով իրենց փողոցներն ու տները, պաշտպանվում էին հենց քաղաքում: Հետո նրանք, ավելի քան 5000 մարդ (երեք քառորդը կանայք ու երեխաներ), բարձրացան քաղաքամերձ ամրոցը: Նրանցից կարողանում էին զենք գործածել միայն 250-ը: Շապին-գարահիսարցիները արիաբար ետ էին մղում թշնամու բոլոր գրոհները: Տեսնելով, որ զենքի ուժով անհնար է ընկճել հերոս պաշտպաններին, թուրքերը կրկին դիմեցին խաբեության, խոստանալով զենքը ցած գնողներին մինչև անգամ ապահովել բնակարաններով՝ Կերասուն կամ Սվազ քաղաքների շրջակայքում (գարահիսարցիների տները արդեն լրիվ քանդված էին): Բայց ամրոցի ռազմիկները չհավատացին թուրքական հրամանատարության նենգ խոստումներին: Ամրոցի վրա հարձակվող զինված թշնամիների թիվը հասնում էր մինչև 5000—6000-ի: Հաշվի առնելով ջրի, սպիտակ և ռազմամթերքի անբավարարությունը շապին-գարահիսարցիները ստիպված եղան թողնել ամրոցը և փոքր խմբերով փորձեցին ճեղքել թուրքական դորամասերի դիրքերն ու դուրս գալ շրջապատումից: Բայց թուրք դահիճների ձեռքից ազատվեց և նախօրոք պայմանավորված Թամզարան վայրը հասավ միայն 870 մարդ, մնացածները սպանվեցին կամ ծանր վիրավորվեցին: Թամզարան հասածների վիճակը նույնպես նախանձելի չէր: Թուրքական զորքերը այստեղ նրանց շրջապատեցին: Շապին-գարահիսարցիները կրկին պաշտպանական դիրքեր գրավեցին: Անհավասար ու դաժան մարտերում նրանք ընկան հերոսական մահով: Շապին-գարահիսարցիներից միայն երկուսին հա-

⁹ Սասունցիների ինքնապաշտպանության մասին տե՛ս ՀՍՍՌ ԿԴՊԱ, ֆ. 227, ց. 1, գ. 463, ԲՔ. 1—5, «Համրավարկը», 1916, № 43, էջ 1355—1356, «Մշակ», 1915, № 207, էջ 1, «Հայաստան», 1917, № 112, էջ 2, «Армянский вестник», 1916, № 4, էջ 1, № 10, էջ 21, № 23, էջ 4:

¹⁰ Տե՛ս Վ. Փափագյան, Իմ հուշերը, հ. Բ, էջ 416:

¹¹ Տե՛ս Ք. Бекгульянц, Вокруг Хныса, «Армянский вестник», 1916, № 41, էջ 12—13:

¹² Տե՛ս Ք. Бекгульянц, 5 дней в Байбурте. «Армянский вестник», 1916, № 30, էջ 17:

ջողկեց դուրս պրծնել շրջապատումից և հասնել ռուսական զորքերի կողմից պրաւված Տրապիզոն քաղաքը¹³։

Թշնամուն հերոսական դիմադրութիւնը ցույց տվեցին Սվազի վիլայեթի Բյուրկ, Չարշամփա, Խուրշիւնլու և մի շարք այլ գյուղերի բնակիչներ։ Սվազի մի խումբ հայեր ինն ամիս թուրքական զորքերի դեմ մղեցին մաներային պաշտպանողական մարտեր և կարողացան Սվազի մոտերքից կռիւներով անցնել մինչև Սև ծովի ափը, և գրավելով թուրքական մի առագաստանավ, թշնամու կրակի տակ մեկնեցին դեպի Բաթումի¹⁴։

Զեյթունն իր 36 գյուղերով՝ 60.000 բնակչութեամբ հատուկ տեղ է գրավում հայ ժողովրդի ազատագրական շարժման պատմութեան մեջ։ Զեյթունը միշտ էլ եղել է հարստահարված ու խոշտանգված հայերի հույսերի և վրեժխնդրութեան խորհրդանիշը։ Զեյթունցիներին խորթ էին վախկոտութիւնն ու աղերսանքը։ Փոքր մարզը կառավարում էին շուրս տոհմային իշխաններ, թուրք կառավարութեանը վճարելով միայն նոմինալ տուրք։ Թուրք իշխանութիւններին դուր չէր գալիս Զեյթունի կիսաանկախ վիճակը. դրա համար էլ նրանք հաճախ այդտեղ էին ուղարկում պատժիչ արշավախմբեր։

Զեյթունցիները դիմացել են 41 պատերազմների և 16 ռազմական ընդհարումների, պաշտպանելով իրենց կիսաանկախութիւնը։ 1914 թ. օգոստոսին, այսինքն մինչև Թուրքիայի պատերազմի մեջ մտնելը, 600 թուրք զինվորներ Մարաշի մյուստեսարիֆ Հայդար փաշայի գլխավորութեամբ մտան Զեյթուն։ Հայդար փաշան ձերբակալեց առավել աչքի ընկնողներին և մարտունակներին, բռնութեամբ խլեց մնացածների զենքերը։ Զերբակալված զեյթունցիներին Հայդար փաշան տարավ Մարաշ, որտեղ բոլորն էլ անխտիր ոչնչացվեցին։ Այնուհետև Զեյթուն մտավ պատժիչ արշավախումբը, կայմակամ Հուսեյին-Հուսնիի և ժանդարմերիայի գնդապետ Սուլեյմանի գլխավորութեամբ։ Բանդիտները խոշտանգում էին զեյթունցիներին, բռնաբարում նրանց կանանց և աղջիկներին։ Թուրքական իշխանութիւնների նման արարքները ծայր աստիճանի հասցրին զեյթունցիների ցասումն ու զայրույթը։ 1915 թ. փետրվարին զեյթունցիները որոշեցին հարձակվել թուրքական տեղական վարչութեան շենքի վրա և գրավել այնտեղ գտնված զենքեր։ Բայց Զեյթունի վերին խավի դավաճանութիւնը խանգարեց իրագործել այդ որոշումը։ Ավելին. դավաճանութեան հետևանքով այդ որոշման նախաձեռնողների մի մասը ձերբակալվեց, իսկ մյուս մասը թաքնվեց լեռնային վանքում։ Զեյթունցիները միջոցներ ձեռնարկեցին օգնելու իրենց հերոսներին։ Զենք ձեռք բերելու նպատակով, նրանք դիմեցին Կովկասյան բանակի շտաբ՝ հայտնելով, որ զենքը հեշտութեամբ կարող է հասնել իրենց, եթե անգլիական կամ ֆրանսիական նավերը այն դուրս բերեն Միջերկրական ծովի ափը։ Չնայած զեյթունցիները զենք չստացան, բայց նրանք շրնկեցին, այլ որոշեցին աջակցել խիզախներին իրենց ունեցած միջոցներով։ Թուրքական իշխանութիւնները իմանալով զեյթունցիների այդ

¹³ Շապին-գարահիսարցիների ինքնապաշտպանութեան մասին տե՛ս Հ ա կ ո ր Տ ե ր - Հ ա ռ ո թ յ ու ն յ ա ն, Շապին-Գարահիսարի ապստամբութիւնը, Թիֆլիս, 1917, էջ 72—115։ Արամ Հայկազ, Շապին-Գարահիսարն ու իր հերոսները, Նյու-Յորք, 1957, էջ 121—183, «Կոչնակ», 1915, № 37, էջ 793։ Հ ա ռ ո թ յ ու ն յ ա ն Հ ա յ կ ա զ, Շապին-Գարահիսարի ապստամբութիւնը, 1955։

¹⁴ Տե՛ս «Le traitement des armeniens dans l'Empire Ottoman (1915—1916)», Paris, 1916, էջ 298—304։ Զ. Ե ս ա յ ա ն, Մուրադի ճամրորդութիւնը Սվազին Պաթում, Պոսթըն, 1920։

որոշման մասին, սկսեցին ուժեր հավաքել: Զեյթունում թուրք զինվորների թիվը հասավ 5000-ի: 1915 թ. մարտի 24-ին Զեյթուն ժամանեցին թուրքական կառավարության գործակալները, որոնց թվում էր և գերմանացի Բլանկրոյերանք Զեյթունի վերին խավի խորհրդակցություն հրավիրեցին և, սպառնալիքի տակ, առաջարկեցին իրենց հանձնել վանքի պաշտպաններին: Զեյթունցիների վերնախավը հրաժարվեց վանքի խիզախների պաշտպանությունից:

Թուրքերը 1915 թ. մարտի 25-ին գրոհեցին վանքի վրա: 12 ժամ շարունակվեց կատաղի ճակատամարտը, թուրքերը կորցրին մոտ 300 զինվոր: Վանքի պաշտպանները գիշերը ձեղքեցին թուրքական կորդոնը և անցան լեռները: Լեռավտյան թուրքերը զրավեցին դատարկ վանքը և կատաղորեն այն այրեցին: Դրանից 15 օր հետո, 1915 թ. ապրիլի 9-ին, թուրքական իշխանությունները սկսեցին արտաքսել Զեյթունի հայ բնակչությանը¹⁵: Միաժամանակ կատարվեց հայերի արտաքսումը նաև Մարաշից: Այստեղ արտաքսումից և ջարհից փրկվեցին միայն 50 պատանիներ, որոնք հեռացան լեռները, միանալով այնտեղ գտնվող զեյթունցիներին, նրանց հետ միասին շաբունակեցին պայարր այնքան ժամանակ, մինչև որ ընկան հերոսական մահով¹⁶:

Թուրքական ջարդարարներին հաջող դիմադրություն ցույց տվեցին Կիլիկիայի հարավ-արևելյան ծայրամասի վեց հայկական գյուղերի բնակիչները՝ սուեդիացիները: 1915 թ. հուլիսի 13-ին թուրքական իշխանությունները նրանց հրամայեցին պատրաստվել արտաքսման: Տեղացիների մի փոքր մասը՝ 60 անտանիք Բիթիաս գյուղի բողոքական եկեղեցու ավագ քահանա Նոխուդյանի լիազորությամբ ենթարկվեց այդ հրամանին: Մնացածները որոշեցին դիմել ինքնապաշտպանության: Այդ նպատակով նրանք բարձրացան Մուսա-լեռան (Ջեբել-Մուսայի) գագաթը, իրենց հետ վերցնելով սլաքներ և ռազմամթերք, այդ թվում 120 նոր սիստեմի հրացան, մի քանի հարյուր հին սիստեմի ատրոնական և որոշ քանակությամբ վառոդ: Լեռը բարձրանալուց հետո, սուեդիացիները պաշտպանությունը ղեկավարելու համար, գաղտնի քվեարկությամբ, լիարեցին հատուկ կոմիտե, որն անմիջապես անցավ գործի: Լեռան գագաթի բոլոր անցուղիների մոտ նշանակվեցին դիտորդներ, կազմակերպվեցին գերազանց հրացանաձիգների պահեստային խմբեր, հանձնարարություններ տրվեց պաշտպանության ամեն մի մասնակցի: Թուրքական զրոհ Մուսա-լեռան վրա սկսվեց 1915 թ. հուլիսի 21-ին, բայց վերջացավ անհաջող: Թուրքերը որոշեցին թնդանոթի կրակի տակ ձնշել լեռան պաշտպանների դիմադրությունը, սակայն հայ նշանառուներից մեկին հաջողվեց ոչնչացնել թշնամու թնդանոթի անձնակազմը, որի հետևանքով, թուրքերը նահանջեցին և սկսեցին պատրաստվել երկրորդ զրոհի: Նրանք Մուսա-լեռան ստորոտում նախկինում բնակված 2000-ի փոխարեն կենտրոնացրին մոտ 3000 զինվոր, 4000 բաշիբոզուկ և մի քանի հրանոթ: Իսկ Մուսա-լեռան պաշտպանների ուժերը զգալիորեն քիչ էին՝ մոտ 5000 հոգի, որոնցից զենք կրելու ընդունակ էին միայն 500-ը: Չնայած դրան Մուսա-լեռան նշանառուները հմտորեն շարքից դուրս էին հանում թուրքական հրանոթների անձնակազմը և խափանում նրանց զրոհները:

¹⁵ Զեյթունցիների ինքնապաշտպանության մասին տե՛ս Գր. Հ. Դալստյան, Մարաշ, Նյու-Յորք, 1934, էջ 171—177, «Կոչնակ», 1915, № 32, էջ 672, № 34, էջ 721—722, № 51, էջ 1138: «Международные отношения в эпоху империализма», серия III, т. VII, ч. I, стр. 304—305, «Quelques documents», Fasc II, Genève, 1916, p. 99—104.

¹⁶ Տե՛ս Գ. Դալստյան, նշված աշխատ., էջ 773:

լեռան պաշտպանները հաճախակի հարձակումներ էին դործում թշնամու վրա: Այդ հարձակումներից մեկի ժամանակ, հաջողվեց ոչնչացնել մոտ 200 թուրքական զինվոր, զրավել 7 մաուդեր, 2500 փամփուշտ: Բայց հարձակվող թուրքական զորքերի թիվը օրեցօր ավելանում էր: 1915 թ. սեպտեմբերի սկզբներին թուրքերի հրամանատարությունը հանձնարարվեց զնդապետ Ռիֆաթ բեյին: Մուսա-լեռան պաշտպաններն արդեն ետ էին մղել թշնամու հինգ կատաղի զորո՜ւ և թուրքերին պատճառել էին մեծ կորուստներ: Իսկ իրենք՝ լեռնցիները ունեին 17 սպանված և 12 վիրավոր: Բայց ժամանակը անցնում էր: Պաշտպանների պարենը և ռազմամթերքը սպառվում էր: Սուեդիահայերի դառը վիճակը, թվում էր կանխորոշված, և նրանց փրկել կարող էր միայն հրաշքը:

Պաշարվածները կարող էին օգնություն ստանալ միայն ծովի կողմից, որին ուղղված էր Մուսա-լեռան բարձր դարափը: Դարափի ծայրին մուսալեռնցիները բարձրացրին երկու մեծ սպիտակ դրոշ, որոնցից մեկի վրա դրոշմված էր կարմիր խաչ, իսկ մյուսի վրա՝ օգնության կոչ: Յրանսիական զրահակիր «Կոշներ» նկատեց Մուսա-լեռան վրա ծածանվող սպիտակ դրոշները:

Մի քանի օր հետո ֆրանսիական նավերը սկսեցին մուսալեռնցիների էվակուացիան: Առաջին հերթին ափին մոտեցած «ժաննա-դր-Արկ» նավը բարձրացրին կանանց, երեխաներին, վիրավորներին և հիվանդներին: Վերջում Մուսա-լեռ թողեցին նրա քաջարի պաշտպանները:

Մուսա-լեռան պաշտպանությունը տևեց 53 օր: Զարդից ու աքսորից փրկվեց 4700 հայ: Մուսալեռնցիները 1915 թ. սեպտեմբերի 14-ին ժամանեցին Պորտ-Սայդ, և այնտեղ բնակություն հաստատեցին¹⁷:

Տրապիզոնի վիլայեթում թշնամուն համառ դիմադրություն ցույց տվեցին մերձսևծովյան Քովաթ-Շափա գյուղի բնակիչները: Երբ 1915 թ. հուլիսին սկսվեց Տրապիզոնի և նրա շրջանի հայերի ջարդն ու աքսորը, քովաթ-շափացիները թողեցին իրենց տները, բարձրացան գյուղը շրջապատող նմուրյան սարերը և կազմակերպեցին ինքնապաշտպանություն: Քովաթ-շափացիների դիմադրությունն այնքան համառ էր, որ թուրքերը որոշեցին դիմել ինքնաթիռների և զերմանական «Բրեսլաու» ռազմանավի օգնությանը: Բայց թուրքական զորո՜ւները ետ էին մղվում: Քովաթ-շափացիների հերոսական ինքնապաշտպանության լուրը հասավ էջմիածին և ամենայն հայոց կաթողիկոսը 1915 թ. սեպտեմբերի 22-ին օգնության կոչով դիմեց Պետրոգրադ. «Եթե նավատորմով շտապ օգնություն չհասցվի, ասված էր կաթողիկոսի հեռագրում, Քովաթ-Շափայի ամբողջ հայ բնակչությունը կկոտորվի: Ես համոզիչ կերպով խնդրում եմ փրկել իմ հոտը դաժադած ֆանատիկոսներից, օգնության գալ անբախտ մարտիկներին, որոնք կոչվում են վերջին ուժերը լարելով...»: Բայց քովաթ-շափացիներին վիճակված էր դեռ երկար պաշտպանողական և մանրաշին մարտեր մղել, մինչև ռուսական զորքերի մոտենալը: Այդ ժամանակա-

17 Մուսալեռնցիների ինքնապաշտպանության մասին տե՛ս «Կոշնակ» 1915, № 44, էջ 963—965, 999, № 51, էջ 1140—1141, № 52, էջ 1167—1170, «Le traitement des armeniens dans l'Empire Ottoman...», pp. 443—460, «Deutschland und Armenien», Potsdam, 1919, Dok. 193, Toynbee Arnold, Armenian atrocities, The murder of a Nation, London, 1916, p. 32, Վրաց. ՍՍԽ ԿԳՊԱ, ֆ. 2, գ. 3108, թ. 62, Werfel Franz, Die vierzig Tage des Musa Dag, Berlin, 1955, E. K. Саркисян, Экспансионистская политика Османской империи в Закавказье..., Ереван, 1962, стр. 281—283.

միջոցում քովաթ-շափացիները կորցրին իրենց կազմի կեսից ավելին: 400 պաշտպաններից ողջ մնաց միայն 100—120 մարդ¹⁸:

Հալեպի վիլայեթում արտաքսմանը դիմադրեցին Ուրֆա քաղաքի հայերը: 1915 թ. սեպտեմբերի 29-ից աշխատանքներ սկսվեցին քաղաքի հայկական թաղամասերում ամբուսթյուններ ստեղծելու ուղղությամբ: Ուրֆա քաղաքի 60—80 ոստիկաններին հոկտեմբերի սկզբին միացավ երկու թուրքական վաշտ և հրամանատար նշանակվեց գնդապետ Ֆահթի փաշան: Ուրֆայի հայերին նա առաջարկեց հանձնվել, բայց վերջիններս մերժեցին նրա առաջարկը: Հոկտեմբերի 6-ին սկսվեց թուրքերի զրոհը: Հայերը պաշտպանության համար հմտորեն օգտագործեցին ամեն մի փողոց, ամեն մի տուն: Հոկտեմբերի 12-ին Ուրֆա ժամանեց թուրքական 3-րդ վաշտը՝ զինված մեծ տրամաչափի հրանոթներով: Թուրքերը մեծ ուժերով անցան հարձակման և հոկտեմբերի 14-ին գրավեցին հայերի դիմադրության կարևոր կետը՝ հայկական եկեղեցին, իսկ հոկտեմբերի 15-ին երկրորդ կարևոր կետը՝ ամերիկյան միսիայի շենքը: Հոկտեմբերի 16-ին Ուրֆա քաղաքի հայերի ինքնապաշտպանությունը ճնշվեց: Վերջին հայերը այստեղ ոչնչացվեցին Ուրֆայի կիրճերում և ջրհորներում: Թուրքական զորքերը այդ կռիվներում կորցրեցին 50 սպանված, 120—150 վիրավոր¹⁹:

Ագանայի վիլայեթում իրենց հերոսական պաշտպանական մարտերով փառաբանվեցին Ֆունջակի, Կիշիֆլիի և Թերեքյոյի հայերը: Մերժելով թուրքական իշխանությունների հրամանը սրտաքսման մասին, նրանք հայտարարեցին. «Մենք ուզում ենք մեռնել որպես հերոսներ և ոչ թե ստրուկներ»:

1915 թ. օգոստոսի 1-ին 8000-անոց թուրքական զորքը գնդապետ Խալիբ բեյի գլխավորությամբ հարձակվեց Ֆունջակի վրա: Թուրքական զորամասերը 24 կատաղի մարտեր մղելուց հետո, միայն 1915 թ. օգոստոսի 6-ին կարողացան տիրել Ֆունջակը²⁰:

Իհարեբեքիի վիլայեթում թշնամուն համառ դիմադրություն ցույց տվեցին Մարգին քաղաքից դեպի հարավ-արևելք ընկած բնակավայրերի հայերը, որոնք ամրացան Սինջար լեռան վրա: Այստեղ նրանք, ետ մղելով թշնամու զրոհները, կարողացան դիմանալ ամբողջ մեկ տարի²¹:

Թշնամուն զինված դիմադրություն ցույց տվեց նաև Իզմիտ ծոցի ափին ընկած հայկական գեղատեսիլ Պարտիզակ գյուղի ինն հազարանոց բնակչությունը: Գիտենալով իրենց սպառնացող ճակատագրի մասին, պարտիզակցիները շենթարկվեցին արտաքսման հրամանին: Այն ժամանակ նրանց դեմ ուղարկվեց ուժեղ ժանդարմերիայի ջոկատ, որին պարտիզակցիները դիմավորեցին կրակով: Ժանդարմները նահանջեցին, կորցնելով 12 մարդ սպանված և վիրավոր: Այդ նույն օրը նրանց դեմ ուղարկվեց ռազմական զորամաս, բայց այն նույնպես նահանջեց, կորցնելով 48 մարդ: Միայն հետևյալ օրը հասարակական անվտանգության պետ Զանփուլատ բեյի հրամանատարությամբ Կոս-

¹⁸ SL՝ս ЦГВИА, ф. 2000с, л. 810, л. 180, «Кавказское слово», 21 апреля 1916, № 89, стр. 2. «Армянский вестник», 1916, № 15, էջ 9, «Կոչնակ», 8 հուլիսի, 1916, № 28, էջ 734.

¹⁹ «Deutschland und Armenien», Dok. 180, 193, «Կոչնակ», 1 ապրիլի 1916:

²⁰ SL՝ս «Ազդ», Պոսթոն, 28 հունվարի 1920, № 149 (1481):

²¹ SL՝ս «Армянский вестник», 1917, № 29—30, էջ 15:

տանդնուպուսից եկած թուրքական վաշտը, զինված 2 հրանոթով, ճնշեց պարտիզակցիներին դիմադրությունը²²:

Թուրքական ավազակներին հայ բնակչությունը դիմադրություն ցույց տվեց նաև ուրիշ վայրերում: Շնորհիվ ինքնապաշտպանության և ռուսական բանակի հարձակման, ողջ մնացած հայերը գաղթեցին Կովկաս:

Ինքնապաշտպանության ելած հայերը պարզ տեսնում էին իրենց թշնամիներին՝ իթթիհատական կառավարությանը և նրա զործակալներին՝ քուրդ բեկերի ավազակախմբերին, թուրքական բանակին և ժանդարմերիային, իսկ թուրք և քուրդ խաղաղ բնակչության ու աշխատավոր զանգվածների նկատմամբ նրանք թշնամաբար չէին տրամադրված: Այդ տեսակետից հատկանշական է Վանի հայերի կողմ ուղղված քաղաքի թուրք բնակչությանը, որի մեջ նշվում էր ստեղծված դրությունից դուրս գալու համար ազդել Վանի վալի Զեվդեթի վրա՝ դադարեցնելու արյունահեղությունը: Կոչում ասված էր, որ Զեվդեթի նման կառավարիչները գալիս ու անցնում են, իսկ ժողովուրդները մնում են: Բայց Զեվդեթն ու նրա սպասավորներն ամեն ինչ արեցին, որպեսզի թուրք բնակիչները չլսեն Վանի պաշտպանների ձայնը:

Ինքնապաշտպանության դիմած հայերը մեծ թվով բարեկամներ ունեին քուրդ և թուրք աշխատավոր բնակչության մեջ, որոնք մշտապես կարեկցում և օգնում էին նրանց: Օրինակ՝ քուրդ Հասանը, հայերի հետ բարեկամություն հաստատելու համար վաղուց ի վեր հետապնդվում էր թուրքական իշխանությունների կողմից: Նա 1915—1916 թթ. ծառայում էր թուրքական զորքերին մատակարարող տրանսպորտում և օգնում էր պաշտպանվող սասունցիներին՝ նրանց մատակարարելով ալյուր, ծխախոտ և տեղեկություններ հասցնում արտաքին աշխարհի մասին:

Կովաթ-Շափայի հայ բնակչության ութամսյա ինքնապաշտպանության մեջ ոչ քիչ դեր խաղաց թուրք Շեվքեթ բեյը: Դիմադրության ամբողջ ժամանակաշրջանում նա հայերի շարքերում կոչվում էր թուրքական զորքերի ղեմ²³:

Հայերի հետ հատկապես բարեկամաբար էին վերաբերվում զզլբաշ քուրդ ղյուղացիները՝ դերսիմցիները: Դերսիմցիները 1916—1920 թթ. իրենց մոտ թաքցրել և մահից փրկել են 20 հազար հայերի²⁴: Նրանք միաժամանակ կատաղի մարտեր էին մղում թուրքական զորքերի դեմ: 1916 թ. մարտի 30-ին դերսիմցիների ջոկատները հասան մինչև խարբերդ և պահանջվեց թուրքական 13-րդ բանակի հատուկ ջանքերը, որպեսզի ստիպեն նրանց ետ նահանջել²⁵:

Հայերի պաշտպաններն էին նաև քուրդ եզիզները, որոնք միայն Սանջար լեռան վրա (Մարդին քաղաքից դեպի հարավ-արևելք) թաքցրեցին մոտ 5000—6000 հայերի²⁶: Նույնը պետք է ասել նաև Մոկսի (Վանա լճից դեպի հարավ ընկած լեռնային տեղանք) քրդերի մասին, որոնց մոտ ապաստան գտան ոչ միայն Մոկսի հայերը, այլև Քարքարի շրջանի (Վանի վիլայեթ) երեք հազար և Վանի Կարճկան, Գավաշ, Շատախ և այլ շրջանների բազմաթիվ հայ բնակ-

22 Տե՛ս հունական «Էֆիմերիս» թերթը, 1915, 8 սեպտեմբերի, «Կոչնակ», 1915, № 42, էջ 921:

23 Տե՛ս «Կոչնակ», 1916, 8 հուլիսի, № 28, էջ 734:

24 Տե՛ս Գ. Ս. Երևանեան, Պատմություն Չարսանձակի հայոց, Պեյրուք, 1956, էջ 66:

25 Նույն տեղում, էջ 143:

26 Տե՛ս «Արմյանսկիյ вестник», 1917, № 29—30, էջ 15:

չությունը²⁷։ Արևմտյան Հայաստանի լեռնային շրջանների գրեթե բոլոր բրդ-
դուկան գյուղերում հայտնաբերվում էին բրդերի կողմից թաքնված հայկական
ընտանիքներ²⁸։

Երիտասարդ թուրքերի կառավարության ջարդարարական քաղաքականու-
թյան դեմ թուրք աշխատավորության ելույթները ամենից առաջ արտահայտ-
վում էին կոտորածի և դեպորտացիայի միջոցառումներին մասնակցելուց հրա-
ժարվելու ձևով։ Եղել են նաև ոչ-քիչ դեպքեր, երբ հասարակ թուրքերը, հաշվի
շառնելով ոչ մի սպառնալիք, թաքցրել են հայերին կամ զենքը ձեռքներին
հանգես են եկել ի պաշտպանություն նրանց։ Գրույ Ջաբել Եսայանը, որը իշ-
խանություններից թաքնվել էր թուրք համաքաղաքացիների մոտ, բազմիցս
լսել է նրանց անկեղծ կարծիքը հայկական կոտորածի մասին։ «Թուրքական
ժողովրդական մասսան, — պատմում է Ջ. Եսայանը, — որոշակիորեն դեմ էր
այդ հետապնդումներին և դրանք իրականացնող կառավարությանը։ Հասա-
րակ մարդկանցից հաճախ կարելի էր լսել, թե «սիրտդ վառվում է», երբ տես-
նում ես, թե ինչ են անում հայերի հետ։ Բնակչությունը կատարվածի ողջ պա-
տասխանատվությունը վերագրում էր «Միություն և առաջադիմություն» կո-
միտեին ու գերմանացիներին, որոնց նկատմամբ կար թույլ քողարկված ատե-
լություն»։ Երբ թուրքերից ինչ որ մեկը Եսայանի մոտ ասաց, որ հայերին հե-
տապնդում են այն բանի համար, որ նրանք դեմ են պատերազմին, մյուսները
խմբով պատասխանեցին. «Իսկ ով է պատերազմի կողմնակից։ Մենք՝ բոլոր
թուրքերս դեմ ենք պատերազմին»-²⁹։

Թուրքական կառավարությունը ճգնելով արդարացնել իր վայրագ գործո-
ղությունները հայերի նկատմամբ, 1916 թ. հրատարակեց «Ճշմարտությունը
հայ ազգային շարժման և կառավարության միջոցառումների մասին» բրո-
շյուրը, որը օտարերկրյա մամուլի մի քանի օրգանների կողմից կոչվեց «Սպի-
տակ գիրք»³⁰։ Այդ գրքում թուրքական կառավարությունը «մեղադրում» էր հա-
երին այն բանի համար, որ նրանք ուսական զորքերի Արևմտյան Հայաս-
տան ներխուժելուց անմիջապես հետո վերցրել են զենք և միացել նրանց։
Որպես ապացույց նա առաջ էր քաշում Վանի «ապստամբությունը»։ Իբր հա-
յերի արստրման մասին կարգադրությունը արված է եղել միայն այդ «ապս-
տամբությունից» հետո այն նպատակով, որպեսզի կանխվի նրա տարածումը
մյուս շրջանների վրա։ Սակայն թուրքական կառավարության այդ պնդումը
մերժվում է փաստերով։

Ինչպես վերը արդեն ցույց տրվեց, Վանում տեղի չէր ունեցել հայերի և
ոչ մի ապստամբություն, այլ եղել էր միայն տարերայնորեն ծագած ինքնա-
պաշտպանություն, որի նպատակն էր պահպանել Վանի հայերին և նրանց մոտ
ապաստան գտած ամելիներին՝ թուրքական կառավարության դատաստանից։
Եվ Վանի հայերը ձեռնամուխ եղան ինքնապաշտպանության կազմակերպմանը
միայն այն բանից հետո, երբ ստեղծվեց քաղաքի հայկական թաղամասերի
պաշարման վտանգը թուրքական զորքերի կողմից։

²⁷ Տե՛ս Արտակ Գարինյան, Հայ ազատագրական շարժման օրերին, Փարիզ, 1947, էջ 295, 308—310։

²⁸ Տե՛ս «Армянский вестник», 1916, № 33, էջ 13—14։

²⁹ Նույն տեղում, № 15, էջ 12—13։

³⁰ «Սպիտակ գիրք» մի մասի թարգմանությունը տե՛ս ՀՍՍՌ-ի ԿՊՊԱ, ֆ. 227, ց. 1, գ. 463, ք. 33։

Հայերի արտաքսումը Կիլիկիայից և Զեյթունից սկսվեց 1915 թ. մարտի 26-ին, իսկ Վանի ինքնապաշտպանությունը տարերայնորեն ծագեց միայն 1915 թ. ապրիլի 7-ին:

Ինչպես արդեն նշվեց, դեռ 1914 թ. օգոստոսին թուրքական զորքերը մտան Զեյթուն, ձերբակալեցին առավել մարտունակ զեյթունցիներին, տարան նրանց Մարաշ և այնտեղ գնդակահարեցին:

Դիմադրությունը ցույց էր տրված արսաքսումից միայն մի քանի օր առաջ, որպես պատասխան իշխանությունների ձեռնարկած միջոցառումների (բնակչությունից զենքի հավաքումը, մուհաջիրների՝ մուսուլմանական վերաբնակիչների կենտրոնացումը Զեյթունի գյուղերի շուրջը և այլն):

Նույնը պետք է ասել արևմտահայերի դիմադրության կամ ինքնապաշտպանության մյուս բոլոր դեպքերի մասին: Ինքնապաշտպանությունը տարերայնորեն ծագեց որպես ցասման, բողոքի արտահայտություն թուրք կառավարության չարագործությունների դեմ:

Չի կարելի մոռանալ նաև այն փաստը, որ հայ բնակչությունը զանգվածային ռեպրեսիաների ենթարկվեց Վանում կատարված ապրիլյան դեպքերից շատ ավելի առաջ: Բնորոշ է, որ այգորինակ կարծիքի էին և այն բոլոր հանրածանոթ օտար հեղինակները, որոնք զբաղվում էին հայկական ողբերգության հարցով (Բրայսը, Տոյնբին, Լեպսիուսը և ուրիշներ): Եվ ճիշտ էր հայ ականավոր գրող Շիրվանզադեն, երբ 1916 թ. ամռանը գրում էր, որ «Արևմտահայերի ողբերգությունը առաջ է եկել ոչ թե նրանց ելույթներով և նույնիսկ տեղական ապստամբություններով թուրքահայ զավառներում, ինչպես այդ ճգնում են ապացուցել որոշ քաղաքներ: Ընդհակառակը, և՛ դրուժինաների առաջացումը, և՛ տեղական ապստամբությունները առաջ են եկել թուրքական կառավարության անօրինակ գազանությունների հետևանքով»³¹:

Թուրքական կառավարությունը, խեղաթյուրելով փաստերը, արևմտահայերի տարերայնորեն ծագած և իրարից անջատ ինքնապաշտպանության կոիվները «Սպիտակ գրքում» ներկայացնում էր որպես միացյալ պլանով մշակված մի ընդհանուր դավադրություն:

Բայց դավադրություն ընդհանրապես չկար, հակառակ դեպքում պետք է լինեին նաև նրա կազմակերպիչներն ու ղեկավարները: Թուրքական կառավարությունը չէր անվանում նրանց և չէր էլ կարող անվանել, որովհետև ոչ մի քաղաքական կուսակցություն կամ խումբ չէր ղեկավարում արևմտահայերի տարերայնորեն ծագած ինքնապաշտպանությունը:

Թուրքական պառլամենտի անդամ դաշնակ Վ. Փափազյանը, որը այդ ժամանակ գտնվում էր ջարդերի շրջանում և կարողացավ ժամանակին փախչել Կովկաս, իր հուշերում գրում է, որ Արևմտյան Հայաստանում գտնվելու ժամանակ շտեմավ որևէ կազմակերպություն, որը ի վիճակի էր նախապատրաստել հայերին առաջիկա դիմադրության համար³²:

Վանի ինքնապաշտպանության մասնակից, հայտնի նկարիչ Փանոս Թերլիմեզյանը այդ մասին գրում է. «Ո՞ր մեկն ըսեմ. միթե բավական չեն վերի օրինակները, ապացուցանելու որ բացարձակապես ժողովրդական պատերազմ

31 «Кавказское слово», 15 октября 1915 г., № 227, стр. 3.

32 Տե՛ս Վ. Փափազյան, Իմ հուշերը, հ. Բ, էջ 320—321:

էր աս և որը այս ու այն կուսակցության և անհատներու վերագրելը հիմնովին թյուրիմացություն մ'է»³³:

Այն, որ հայերի «ղավաղությունը», «ապստամբությունը» կամ «հեղափոխությունը» ցինիկաբար հորինված էին թուրքական կառավարության կողմից՝ իր սեփական ոճրագործությունները արդարացնելու համար, իր ժամանակին աշխարհին հայտնեցին թուրքիայում հայ իրադարձությունների բոլոր գիտակաները. գերմանացի լեպսիտուր և անգլիացի Բրայսը, ֆրանսիացի Բարբին և ուրիշ Մանդելշտամը և ուրիշներ:

Հայերի գենոցիդը, որպես Օսմանյան կայսրության պետական քաղաքականության արտահայտություն, մշակվեց և իրականացվեց երիտթուրքերի կառավարության կողմից պանթուրքական և պանիսլամական պլանների հիման վրա:

Ст. М. Акопян

САМООБОРОНА ЗАПАДНЫХ АРМЯН В 1915—1916 ГГ.

Р е з ю м е

Во время проводимой младотурецким правительством массовой резни и депортации армян в 1915—1916 гг. западные армяне почти повсеместно поднялись на борьбу за право своего физического существования и показали в этой борьбе величайшие примеры отваги и мужества.

Очаги самообороны западных армян стихийно возникли в Ване, Шатахе, Битлисе, Шапин-Гарайсаре, Муше, Сасуне, Мараше, Зейтуне, Хнусе, Харпуте, Байбурте, на горе Муса-Таг (Джебель-Муса), Урфе, Партизаке и других местах.

Однако оборонительные бои не имели единого организующего центра и они не носили характера восстания, как об этом цинично заявляли организаторы резни беззащитного армянского населения.

Геноцид армян в Османской империи, как выражение государственной политики, был выработан и осуществлен младотурецким правительством на основе его пантюкистских, панисламистских планов.

³³ «Վան-Տնուց», 1916, ամբիլ, № 22—23, էջ 11: